

**Company Name** : OCK Group Berhad  
**Date** : 02 September 2014  
**Source** : Bernama

## **OCK Group Dapat Kelulusan Pemegang Saham Ambil Alih PT Mulia**

KUALA LUMPUR, 2 Sept (Bernama) -- Pemegang saham OCK Group Bhd hari ini bersetuju dengan cadangan pengambilalihan 85 peratus kepentingan ekuiti dalam PT Putra Mulia Telecommunication (PMT) dengan pelunasan berjumlah RM21.25 juta.

Ketua Pegawai Eksekutif Kumpulan, Ooi Chin Khoon, berkata pengambilalihan itu akan selesai dalam masa sebulan dan dijangka menyumbang pendapatan sebanyak RM7 juta hingga RM10 juta kepada syarikat itu menjelang akhir tahun.

"Kami menjangkakan sumbangan penuh RM20 juta kepada pendapatan syarikat menjelang tahun kewangan 2015, dan akan menjadi sebahagian daripada pendapatan berulang bagi kumpulan ini," katanya kepada pemberita selepas mesyuarat agung luar biasa (EGM) syarikat itu di sini, Selasa.

PMT ialah sebuah syarikat yang berpangkalan di Indonesia, yang pada asasnya menyediakan penyelesaian telekomunikasi.

Ooi berkata cadangan pengambilalihan itu sejajar dengan strategi kumpulan itu untuk bertapak kukuh di peringkat serantau dan mendapatkan pendedahan dalam ekonomi dinamis serta menjana pertumbuhan jangka panjang bagi perniagaannya.

Persatuan Telekomunikasi Selular Indonesia mengunjurkan pertumbuhan industri itu tahun ini dalam lingkungan tujuh hingga lapan peratus, yang didorong oleh pertumbuhan dalam negara kasar yang dianggarkan sebanyak kira-kira enam peratus.

Menurut Ooi, beliau menjangka sumbangan pendapatan daripada operasi luar negara syarikat itu meningkat kepada 20 hingga 30 peratus dalam masa dua hingga tiga tahun, daripada sumbangan kurang daripada 10 peratus pada 2014.

Tentang cadangan menambah modal saham dibenarkan yang juga diluluskan pada EGM hari ini, beliau berkata tawaran itu telah menyebabkan harga sahamnya turun sedikit, tetapi dijangka meningkat dalam enam bulan kedua tahun ini.

"Ia tidak akan menjejaskan rancangan kami untuk disenaraikan dalam Pasaran Utama Bursa Malaysia menjelang akhir tahun," katanya.

Beliau berkata kumpulan itu menyasarkan untuk mengembangkan perniagaan teknologi hijaunya, di samping mempertimbangkan untuk membeli lebih banyak ladang solar, tetapi bilangannya akan bergantung kepada kuota yang ditetapkan oleh kerajaan di bawah tarif galakan.

Ooi berkata syarikat itu juga menyasarkan untuk menambah tapak menara telekomunikasinya kepada 300 menjelang akhir tahun daripada 240 sekarang, untuk memanfaatkan peningkatan permintaan oleh syarikat-syarikat telekomunikasi ke arah memenuhi petunjuk prestasi utama masing-masing.

-- BERNAMA